

BOSANSKI JEZIK

**P R A V I L N I K
O POSTUPKU IZDAVANJA LICENCE, KAO I SADRŽAJU
I IZGLEDU LICENCE**

Sarajevo, oktobra 2013. godine

Na osnovu člana 148. stava 3., a u vezi sa članom 236. stav 1. alineja 25. Zakona o zdravstvenoj zaštiti („Službene novine Federacije BiH“, br. 46/10 i 75/13), federalni ministar zdravstva, d o n o s i

Pravilnik o postupku izdavanja licence, kao i sadržaju i izgledu licence

I - OPĆE ODREDBE

Član 1.

(1)Ovim pravilnikom utvrđuje se postupak izdavanja, kao i sadržaj i izgled odobrenja za samostalan rad za zdravstvene radnike (u daljem tekstu: licenca).

(2)Licenca iz stava 1. ovog pravilnika izdaje se zdravstvenim radnicima državljanima Bosne i Hercegovine (u daljem tekstu: BiH), zdravstvenim radnicima državljanima Evropske unije odnosno evropskog privrednog prostora (u daljem u tekstu: EU/EPP), zdravstvenim radnicima državljanima država koje nisu države članice Evropske unije odnosno evropskog privrednog prostora koje imaju bolonjski sistem obrazovanja (u daljem tekstu: treće države), a koji obavljaju poslove svog stručnog naziva na teritoriji Federacije Bosne i Hercegovine (u daljem tekstu: Federacija BiH).

(3)Postupak izdavanja licence iz stava 1. ovog člana podrazumijeva i obnavljanje i oduzimanje licence.

Član 2.

(1)Postupak izdavanja, obnavljanja i oduzimanja licence zdravstvenim radnicima u Federaciji BiH provodi nadležna federalna, odnosno kantonalna komora (u daljem tekstu: komora) koja je registrirana za izdavanje, obnavljanje i oduzimanje licence.

(2)Postupci iz stava 1. ovog člana se provode u skladu sa Zakonom o zdravstvenoj zaštiti („Službene novine Federacije BiH“, br. 46/10 i 75/13) (u daljem tekstu: Zakon), posebnim zakonima o profesionalnoj samoregulaciji zdravstvenih radnika, ovim pravilnikom, statutom komore, kao i propisom federalne komore kojim se utvrđuje zajednički sadržaj stručnog usavršavanja, rokovi i postupak provjere stručnosti koje je zdravstveni radnik ostvario u okviru stručnog usavršavanja donijetog u smislu člana 221. stav 6. alineja 1. Zakona (u daljem tekstu: kriteriji stručnog usavršavanja).

(3)Licenca izdata od strane nadležne federalne komore ima važnost na cijeloj teritoriji Federacije BiH, dok licenca izdata od strane kantonalne komore ima važnost samo za područje kantona.

Član 3.

(1) Licenca iz člana 1. ovog pravilnika je javna isprava kojom se dokazuje stručna osposobljenost zdravstvenog radnika za samostalan rad prilikom neposrednog obavljanja poslova iz djelokruga rada zdravstvenog radnika.

(2) Licenca se izdaje kao redovna i privremena.

(3) Redovna licenca se izdaje na period od šest godina.

(4) Privremena licenca se izdaje na period kraći od šest godina.

(5) Licenca se izdaje sa datumom upisa zdravstvenog radnika u registar članova komore.

Član 4.

(1) Uvjeti za izdavanje licence su:

- 1) stručna kvalifikacija koja obuhvaća formalno obrazovanje;
- 2) položen stručni ispit u stručnom zvanju;
- 3) članstvo u komori,
- 4) državljanstvo Bosne i Hercegovine,
- 5) poznavanje jednog od jezika koji je u službenoj upotrebi u Federaciji BiH na nivou koji je potreban za nesmetanu i nužnu komunikaciju sa pacijentom.

(2) Izuzetno, uvjet predviđen u stavu 1. tačka 4. ovog člana nisu dužni ispuniti zdravstveni radnici koji su državljani EU/EPP, kao i državljani trećih zemalja.

(3) Zdravstveni radnici državljani BiH dužni su ispuniti sve uvjete iz stava 1. ovog člana, izuzev uvjeta pod tačkom 5. istog stava i istog člana.

Član 5.

(1) Komora vodi registar licenciranih članova komore, druge upisnike i evidencije.

(2) Registri, upisnici i evidencije iz stava 1. ovog člana su javne knjige.

(3) Izvaci iz registara, upisnika i evidencija komore, te potvrde izdate na osnovu podataka iz tih evidencija su javne isprave.

(4) Komora štiti pravo na privatnost svojih članova saglasno Zakonu o zaštiti ličnih podataka Bosne i Hercegovine ("Službeni glasnik BiH", broj 32/01).

II - POSTUPAK IZDAVANJA LICENCE

1. Za zdravstvene radnike državljane BiH

Član 6.

(1) Uz zahtjev i ispunjene uvjete propisane u članu 4. ovog pravilnika zdravstveni radnik dužan je dostaviti slijedeću dokumentaciju:

- 1) ovjerenu fotokopiju diplome visoke, više ili srednje stručne spreme zdravstvenog usmjerenja, odnosno rješenje o nostrifikaciji diplome visoke, više ili srednje stručne spreme zdravstvenog usmjerenja, stečene u inostranstvu izdatu od nadležnog organa saglasno propisima o visokom obrazovanju;
- 2) ovjerenu fotokopiju uvjerenja o položenom stručnom ispitu, a u slučaju da je stručni ispit položen izvan BiH dokaz o priznatom stručnom ispitu od strane Federalnog ministarstva zdravstva (u daljem tekstu: Ministarstvo) saglasno Zakonu i propisima donijetim na osnovu Zakona;
- 3) uvjerenje o državljanstvu;
- 4) ovjerenu izjavu o poštivanju etičkih i deontoloških načela struke (u daljem tekstu: etički principi struke).

(2) Za zdravstvenog radnika-liječnika koji ispunjava uvjete za dodjelu licence, komora može zatražiti, po službenoj dužnosti, od nadležnog organa iz BiH i inostranstva, podatke iz kaznene evidencije, a koji se odnose na dokaz o postojanju pravosnažne presude za počinjena krivična djela koja ga čine nedostojnim za obavljanje liječničke djelatnosti u smislu člana 28. Zakona o liječništvu („Službene novine Federacije BiH“, broj 56/13).

(3) Dokumentacija iz stava 1. ovog člana predaje se u ovjerenoj fotokopiji, a original i ovjerena fotokopija obavezno se predočava službenom licu komore na licu mjesta.

Član 7.

(1) Zdravstveni radnik koji je položio specijalistički, odnosno subspecijalistički ispit, pored dokumentacije iz člana 6. ovog pravilnika, uz zahtjev za izdavanje licence, dužan je dostaviti i ovjerenu fotokopiju uvjerenja o položenom specijalističkom, odnosno subspecijalističkom ispitu, a u slučaju da je specijalistički, odnosno subspecijalistički staž i ispit obavljen izvan BiH dokaz o priznatom specijalističkom, odnosno subspecijalističkom stažu i specijalističkom i subspecijalističkom ispitu od strane Ministarstva saglasno Zakonu i propisima donijetim na osnovu Zakona.

(2) Zdravstveni radnik koji je stekao akademski titulu, nastavno-naučno zvanje, odnosno naziv primarijus, dužan je komori dostaviti i ovjerenu fotokopiju uvjerenja o stečenoj akademskoj tituli, odnosno nastavno-naučnom zvanju ili počasnom nazivu primarijus.

(3) Dokumentacija iz st. 1. i 2. ovog člana predaje se u ovjerenj fotografiji, a original i ovjerenu fotografiju dužan je predložiti službenom licu Komore na licu mjesta.

Član 8.

(1) Zdravstvenom radniku-državljaninu BiH, koji je djelatnost u okviru svoje struke obavljao u drugom entitetu, Distriktu Brčko, odnosno inostranstvu, izdaje se licenca od dana upisa u komoru sa teritorije Federacije BiH.

(2) Zdravstveni radnik iz stava 1. ovog člana, dužan je, prilikom podnošenja zahtjeva za izdavanje licence, osim dokumentacije iz čl. 6. i 7. ovog pravilnika priložiti i potvrdu o članstvu ili aktivnostima u odgovarajućoj komori u drugom entitetu, Distriktu Brčko odnosno inostranstvu, te potvrdu o poštivanju etičkih principa struke, odnosno da se protiv podnosioca zahtjeva iz stava 1. ovog člana ne vodi disciplinski postupak (tzv. *good standing*).

(3) Potvrda o poštovanju etičkih principa struke, odnosno potvrda o nevođenju disciplinskog postupka iz stava 2. ovog člana ne smije biti starija od tri mjeseca, a izdaje je nadležna komora čiji je član podnositelj zahtjeva.

(4) Dokumentacija iz st. 1. i 2. ovog člana predaje se u ovjerenj fotografiji, a original i ovjerenu fotografiju dužan je predložiti službenom licu komore na licu mjesta.

(5) Dokumentacija iz st. 1. i 2. ovog člana mora biti na jednom od jezika koji su u službenj upotrebi u BiH odnosno, ukoliko je na stranom jeziku, mora biti prevedena na jedan od jezika koji su u službenj upotrebi u BiH od strane ovlaštenog sudskog tumača.

2. Za zdravstvene radnike-strane državljane

Član 9.

(1) Zdravstveni radnici-strani državljani, koji podnose zahtjev za izdavanje licence u Federaciji BiH, a po osnovu radne dozvole, dužni su uz zahtjev za izdavanje licence, osim dokumentacije iz čl. 6. i 7. ovog pravilnika, priložiti i:

- 1) dokaz o državljanstvu EU/EPP ili treće države,
- 2) dokumentaciju određenu važećim propisima o kretanju i boravku stranaca, kao i azilu, radnu dozvolu za strance izdatu od nadležnog organa u skladu sa propisima koji reguliraju oblast zapošljavanja stranih državljana,
- 3) potvrdu o članstvu i aktivnostima u odgovarajućoj komori zemlje porijekla,
- 4) potvrdu o poštivanju etičkih principa struke, odnosno da se protiv podnosioca zahtjeva ne vodi disciplinski postupak (tzv. *good standing*), koja ne smije biti starija od tri mjeseca, a izdaje je nadležna komora čiji je član podnositelj zahtjeva,
- 5) potvrdu o poznavanju jednog od jezika koji je u službenj upotrebi u BiH, na nivou koji je potreban za nesmetanu i nužnu komunikaciju sa pacijentom, izdatu

od licencirane škole prema zajedničkom evropskom referentnom okviru za jezike, minimalno stepen C1 (napredni korisnik), osim ako je jezik dodiplomske nastave bio bosanski, srpski ili hrvatski jezik.

(2) Zdravstveni radnici-strani državljani iz stava 1. ovog člana nisu dužni priložiti uvjerenje o položenom stručnom ispitu ukoliko su državljani EU/EPP, odnosno državljani trećih zemlja koje imaju bolonjski sistem obrazovanja.

(3) Dokumentacija iz st. 1. i 2. ovog člana predaje se u ovjerenj fotografiji, a original i ovjerenu fotografiju dužan je predložiti službenom licu komore na licu mjesta.

(4) Dokumentacija iz st. 1. i 2. ovog člana mora biti na jednom od jezika koji su u službenj upotrebi u BiH odnosno, ukoliko je na stranom jeziku, mora biti prevedena na jedan od jezika koji su u službenj upotrebi u BiH od strane ovlaštenog sudskog tumača.

Član 10.

(1) Zdravstveni radnici-strani državljani iz člana 9. ovog pravilnika koji privremeno borave na teritoriji Federacije BiH neposredno obavljajući poslove svog stručnog naziva, kroz:

- naučno i stručno istraživanje u oblasti zdravstva,
- edukacije,
- učestvovanje u seminarima, kongresima i drugim radionicama na kojima prezentiraju stečene vještine svog stručnog zvanja izravno na pacijentima dobrovoljcima,
- obavljanja poslova konsultanta u zdravstvenim ustanovama i privatnim praksama u Federacije BiH,
- učešća u projektima iz oblasti zdravstva koji podrazumijevaju primjenu stečenih stručnih znanja i vještina izravno na pacijentima dobrovoljcima,
- volonterskog rada u svom stručnom zvanju,

uz zahtjev za izdavanje licence prilažu dokumentaciju navedenu u članu 9. ovog pravilnika, kao i dokaz od nadležnog organa kojim se potvrđuje status privremenog boravka na teritoriji Federacije BiH.

(2) Zdravstvenim radnicima-stranim državljanima iz stava 1. ovog člana, na osnovu uredno dokumentiranog zahtjeva, izdaje se privremena licenca sa rokom važenja koliko traje i privremeni boravak na teritoriji Federacije BiH iz razloga predviđenih u stavu 1. istog člana.

3. Za penzionisane zdravstvene radnike

Član 11.

(1) Penzionisanom zdravstvenom radniku-korisniku starosne penzije, koji je bio je nosilac licence do prestanka radnog odnosa po sili zakona zbog odlaska u starosnu penziju saglasno propisima o penzijsko-invalidskom osiguranju, može se izdati licenca u skladu sa odredbama ovog pravilnika, kao i statutom komore.

(2) Penzionisani zdravstveni radnik iz stava 1. ovog člana, dužan je uz zahtjev za izdavanje licence, osim dokumentacije navedene u čl. 6. i 7. ovog pravilnika, priložiti i ovjerenu fotografiju rješenja o korištenju starosne penzije, kao i liječnički nalaz o zdravstvenj sposobnosti za obavljanje poslova svoje struke.

(3) Dobna granica do koje se može izdavati licenca penzionisanom zdravstvenom radniku iz stava 1. ovog člana bliže se uređuje statutom komore, a saglasno članu 223. stav 2. alineja 4. Zakona.

(4) Dokumentacija iz stava 1. ovog člana predaje se u ovjerenj fotografiji, a original i ovjerenu fotografiju dužan je predložiti službenom licu komore na licu mjesta.

Član 12.

(1) Zdravstvenom radniku državljaninu BiH i zdravstvenom radniku stranom državljaninu, a koji u roku od 15 godina od dana položenog stručnog ispita nije obavljao minimalno dvije godine, u punom radnom vremenu, djelatnost svog stručnog naziva, komora će izdati licencu samo uz prethodnu provjeru stručne osposobljenosti.

(2) Provjera stručne osposobljenosti zdravstvenog radnika iz stava 1. ovog člana obavlja se pred komisijom federalne komore u koju se obavezno kooptiraju kao članovi: predstavnik strukovnog udruženja, ukoliko je isto osnovano, te predstavnik Ministarstva.

(3) Zdravstvenom radniku iz stava 1. ovog člana koji je zadovoljio u postupku provjere stručne osposobljenosti, izdaje se licenca s danom položenog ispita radi provjere stručne osposobljenosti.

(4) Sadržaj i način provjere stručne osposobljenosti propisuje se posebnim aktom federalne komore.

4. Postupanje komore po podnijetom zahtjevu za izdavanje licence

Član 13.

(1) Zahtjev za izdavanje licence iz čl. 6, 8, 9, 10. i 11. ovog pravilnika predaje se neposredno ili šalje poštom pismeno na adresu komore.

(2) Prilikom neposrednog predavanja zahtjeva komori isti mora biti predat lično od strane člana komore, te se tom prilikom obavezno utvrđuje identitet člana komore uvidom u važeću ličnu kartu ili drugi važeći lični dokument sa slikom, kao što je vozačka dozvola ili pasoš.

(3) Ukoliko se neposredno predaje zahtev komori od strane drugog lica tj. advokata, zakonskog zastupnika ili opunomoćenika, a u ime i za račun člana komore, uz zahtjev se mora predati i originalna važeća punomoć lica koje u ime člana komore podnosi podnesak.

Član 14.

(1) Ako zahtjev sadrži neki formalni nedostatak koji sprječava postupanje po istom ili je nerazumljiv ili nepotpun, ne može se samo zbog toga odbaciti.

(2) Komora je dužna učiniti one radnje koje će osigurati da se nedostaci otklone i odredit će podnosiocu zahtjeva rok u kome je dužan da to učini.

(3) Saznanja iz stava 2. ovog člana, mogu se saopšiti podnosiocu pismeno, faksom ili telefonski, a i usmeno, ako se podnosilac zatekne kod komore koja ovo saopćava.

(4) O učinjenom saopćenju komora će sastaviti službenu zabilješku u spisu.

(5) Ako podnosilac otkloni nedostatke u određenom roku, smatrat će se da je zahtjev bio od početka uredan.

(6) Ako podnosilac ne otkloni nedostatke u određenom roku, pa se uslijed toga ne može postupati u vezi sa zahtjevom, smatrat će se da zahtjev nije ni podnesen. O tome će komora donijeti zaključak protiv koga se može izjaviti posebna žalba nadležnom drugostepenom organu komore, na način i pod uvjetima utvrđenim statutom komore.

Član 15.

(1) Podnijeti zahtjevi se uzimaju u razmatranje ako su uredno dokumentirani i podnijeti od ovlaštenog lica na način i po postupku utvrđenim ovom pravilnikom.

(2) Komora donosi odluku o izdavanju licence, odnosno odluku o odbijanju izdavanja licence u roku od 30 dana od dana prijema uredno dokumentiranog zahtjeva.

(3) Ukoliko komora u propisanom roku ne donese odluku iz stava 1. ovog člana dužna je zdravstvenom radniku izdati potvrdu o prijemu uredno dokumentiranog zahtjeva za izdavanje licence.

(4) Protiv odluke iz stava 1. ovog člana dozvoljena je žalba nadležnom drugostepenom organu komore, na način i pod uvjetima utvrđenim statutom komore.

Član 16.

Zdravstveni radnik, član komore, dužan je blagovremeno obavijestiti komoru o svim nastalim promjenama koje su od uticaja na izdatu licencu (stečen stručni naziv specijalista, odnosno subspecijalista, stečeno zvanje primarijusa, stečeno naučno-nastavno zvanje i sl.), a koje se upisuju u registar članova komore.

Član 17.

Odredbe ovog pravilnika shodno se primjenjuju i na zdravstvene radnike uposlene u organima uprave svih nivoa vlasti u Federaciji BiH, zavodima zdravstvenog osiguranja, školama i fakultetima zdravstvenog usmjerenja, privrednim društvima i drugim ustanovama i organizacijama, ukoliko dobrovoljno pristupe u članstvo komore, te podnesu zahtjev za izdavanje licence.

III - POSTUPAK ZAMJENE LICENCE UNUTAR VREMENSKOG PERIODA VAŽENJA LICENCE

Član 18.

Zdravstveni radnik VSS dužan je od komore zatražiti zamjenu važeće licence, u slijedećim slučajevima, i to ukoliko unutar roka važenja izdate licence:

- položi specijalistički ispit,
- položi subspecijalistički ispit,
- saglasno posebnim propisima stekne status specijaliste određene specijalnosti ili subspecijalnosti.

Član 19.

(1) Zahtjev za zamjenu licence podnosi se komori zajedno sa dokumentacijom kojom se dokazuje status iz člana 18. ovog pravilnika.

(2) Odredbe ovog pravilnika o načinu podnošenja zahtjeva za izdavanje licence, sadržaju i izgledu dokumentacije, kao i načinu i rokovima postupka rješavanja zahtjeva za izdavanje licence shodno se primjenjuju i na zamjenu licence unutar vremenskog važenja licence.

Član 20.

(1) U slučajevima iz člana 18. ovog pravilnika zdravstvenom radniku VSS se izdaje nova licenca sa datumom položenog specijalističkog ispita, subspecijalističkog ispita, odnosno sa datumom sticanja statusa specijalista određene specijalnosti ili subspecijalnosti.

(2) Vremenski period utvrđen odlukom komore o izdavanju licence iz stava 1. ovog člana ne može biti duži od vremenskog perioda na koji je izdana licenca koja se zamjenjuje.

(3) Licenca koja se zamjenjuje novom licencom poništava se.

Član 21.

Odredbe čl. 18, 19. i 20. ovog pravilnika na odgovarajući se način primjenjuju i u slučajevima kada zdravstveni radnik VSS stekne naziv primarijus, odnosno akademski stepen ili je izabran u naučno-nastavno ili nastavno zvanje, te u slučajevima promjene ličnih podataka.

IV - POSTUPAK OBNAVLJANJA LICENCE

Član 22.

Zdravstveni radnik stiče pravo na obnovu licence, ako je u roku važenja licence, u postupku kontinuirane edukacije, zadovoljio kriterije stručnog usavršavanja.

Član 23.

(1) Zdravstveni radnik dužan je komori podnijeti zahtjev za obnavljanje licence, u roku od 60 dana prije isteka roka na koji je važeća licenca izdata.

(2) Uz zahtjev iz stava 1. ovog člana podnosi se dokumentacija kojom se dokazuje ispunjenost kriterija stručnog usavršavanja u postupku kontinuirane edukacije.

Član 24.

Odredbe ovog pravilnika o načinu podnošenja zahtjeva za izdavanje licence, sadržaju i izgledu dokumentacije, kao i načinu i rokovima rješavanja zahtjeva za izdavanje licence shodno se primjenjuju i u postupku obnavljanja licence.

Član 25.

(1) Zdravstvenom radniku kome je u skladu sa propisima o radu, kao i drugim propisima koji uređuju rad izbornih zvaničnika, odobreno mirovanje radnog odnosa, rok za ispunjavanje uvjeta za obnavljanje licence produžava se za utvrđeni period mirovanja radnog odnosa, i to u slijedećim slučajevima:

- 1) izabranom, odnosno imenovanom zdravstvenom radniku na neku od javnih dužnosti u organe BiH, Federacije BiH, organe kantona, grada, općine i zaposleniku izabranom na profesionalnu funkciju u sindikatu;
- 2) upućivanje na rad u inostranstvo od strane poslodavca ili u okviru međunarodno-tehničke ili obrazovno-kulturne saradnje, diplomatska, konzularna i druga predstavništva.

(2) Zdravstvenom radniku, čiji je bračni drug upućen u inostranstvo u slučajevima iz stava 1. tačka 2. ovog člana i sa kojim zdravstveni radnik zajedno odlazi u inostranstvo, rok za ispunjavanje uvjeta za obnavljanje licence produžava se za utvrđeni period mirovanja radnog odnosa.

(3) Ako zdravstveni radnik iz opravdanih razloga utvrđenih zakonom, kao što su: privremena spriječenost za rad duža od šest mjeseci, trudnoća i komplikacije u vezi sa održavanjem trudnoće, porodijsko odsustvo i odsustvo radi njege djeteta, odnosno člana uže porodice i drugi opravdani slučajevi, nije ostvario uvjete iz čl. 22. i 23. ovog pravilnika, rok za ispunjavanje uvjeta za obnavljanje licence produžava se za period trajanja navedenih razloga koji su prouzročili nemogućnost obnavljanja licence u Zakonom propisanom roku.

(4) U slučajevima iz st. 1, 2. i 3. ovog člana, zdravstveni radnik je dužan komori podnijeti dokaze kojim dokazuje postojanje okolnosti koje su prouzročile nemogućnost obnavljanja licence u propisanom roku.

Član 26.

U slučaju nastanka okolnosti iz člana 25. ovog pravilnika, na dokumentiran zahtjev zdravstvenog radnika komora izdaje odluku o mirovanju statusa člana komore, odnosno mirovanju licence.

V - ODUZIMANJE LICENCE

Član 27.

Zdravstvenom radniku licenca može biti oduzeta privremeno ili trajno.

Član 28.

Komora oduzima zdravstvenom radniku licencu, ako:

- ne zadovoljava prilikom obnavljanja licence;
- komora odredi tu mjeru kao najstrožu kaznu zbog kršenja etičkih principa struke;
- dopunski rad obavlja suprotno odredbama Zakona,
- u drugim slučajevima utvrđenim statutom komore.

Član 29.

(1) Ukoliko komora utvrdi da su nastupili uvjeti za oduzimanje licence iz člana 28. ovog pravilnika, donosi odluku o oduzimanju licence.

(2) Protiv odluke iz stava 1. ovog člana dozvoljena je žalba nadležnom drugostepenom organu komore, na način i pod uvjetima utvrđenim statutom komore.

Član 30.

Komora je dužna, bez odlaganja, o privremenom ili trajnom oduzimanju licence zdravstvenom radniku, obavijestiti poslodavca zdravstvenog radnika, zavod zdravstvenog osiguranja, kao i nadležnu zdravstvenu inspekciju.

VI - IZGLED I SADRŽAJ LICENCE

Član 31.

(1) Licenca se izdaje na obrascu koji je sastavni dio ovog pravilnika (Prilog br. 1.).

(2) U licencu iz stava 1. ovog člana upisuju se slijedeći podaci:

- tačan naziv i sjedište komore koja izdaje licencu,
- broj licence,
- mjesto i datum izdavanja licence,
- ime, ime jednog roditelja i prezime zdravstvenog radnika,
- datum, mjesto i država rođenja zdravstvenog radnika,
- naznačenje stručnog naziva, naziva specijaliste odnosno subspecijaliste, akademske titule, odnosno naučno-nastavnog zvanja zdravstvenog radnika ili počasnog zvanja primarijus,
- datum i mjesto polaganja stručnog ispita, kao i naznačenje ispitne komisije nadležnog ministarstva zdravstva,
- stručna oblast za koju se licenca izdaje,
- period važenja licence (dan, mjesec, godina),
- potpis predsjednika komore i pečat komore.

VII – PRELAZNE I ZAVRŠNE ODREDBE

Član 32.

Komore su dužne, u roku od 90 dana od dana stupanja na snagu ovog pravilnika, uskladiti svoje opće akte sa odredbama ovog pravilnika, te osigurati svojim članovima izdavanje licence na obrascu propisanom ovim pravilnikom (Prilog br. 1.).

Član 33.

Ovaj pravilnik stupa na snagu osmog dana od dana objavljivanja u „Službenim novinama Federacije Bosne i Hercegovine“.

Broj: 01-37- 5563 /13
10.10. 2013. godine
S a r a j e v o

MINISTAR

Prof. dr. Rusmir Mesihović

**BOSNA I HERCEGOVINA
FEDERACIJA BOSNE I HERCEGOVNE**

.....
(puni naziv komore koja izdaje licencu)

Broj:

Mjesto i datum:

Na osnovu člana 148. stav 1., a u vezi sa članom 222. alineja devet Zakona o zdravstvenoj zaštiti ("Službene novine Federacije BiH", br. 46/10 i 75/13), kao i odredbama člana 2. Pravilnika o postupku izdavanja licence, kao i sadržaju i izgledu licence ("Službene novine Federacije BiH", broj),,

(puni naziv komore koja izdaje licencu)

i z d a j e

**LICENCU
za samostalan rad**

1.
(ime, ime jednog roditelja i prezime zdravstvenog radnika)

rođen-a
(datum) (mjesto) (država)

za
(naznačenje stručnog naziva, naziva specijaliste odnosno subspecijaliste, akademske titule odnosno naučno-nastavnog zvanja zdravstvenog radnika ili počasnog zvanja primarijus)

2. je dana
(ime, ime jednog roditelja, prezime zdravstvenog radnika)

..... godine, u položio stručni ispit za naziv
(mjesto polaganja stručnog ispita)

.....
(naznačenje stručnog naziva)

pred ispitnom komisijom
(tačan naziv nadležnog ministarstva zdravstva)

te je stekao uvjete za izdavanje licence za samostalan rad.

3. Ovom licencom odobrava se
(ime, ime jednog roditelja, prezime zdravstvenog radnika)
samostalno obavljanje poslova u okviru stečenog naziva

.....
(naznačenje stručnog naziva, naziva specijaliste odnosno subspecijaliste, akademske titule odnosno naučno-nastavnog zvanja zdravstvenog radnika ili počasnog zvanja primarijus)

4. Licenca se izdaje sa rokom važenja od 6 godina, i to u periodu od
..... do
(dan, mjesec, godina) (dan, mjesec, godina)

PREDSJEDNIK KOMORE

M.P.